



बंगलादेश नू कुँडुखर
गही
उज्जना-बिज्जना



नेम्हस एकका

बंगलादेश नू कुँडुखर

गही

उज्जना-बिज्जना

नेम्हस एकका

कुँडुख राजी

Web : www.kurukhworld.bravehost.com

email : kurukhworld@yahoo.co.in

बंगलादेश नू कुँडुखर गही उज्जना-बिज्जना

Copyright © 2008 by KurukhWorld.
All Rights Reserved.

ई पुथिन एकन्ने रओी अन्नेम उय्यर बचना, कोपी नंना, संगियर अरा एङपा आलार मे खट्टना दरा तंगआ वेबजल्ली नू चितआना खतरी उर्मर निछन्द रअंनर। टुडुस अरा चिपितअुर ती मूद नुम बेगर अदिया होअंर गोट्टे पुथिन चाहे जुक्क खंडन इलेक्ट्रानिक, यांत्रिक, फोटो कोपी, रेकार्ड नंना चाहे एकअंम किसिम गही जोगाबअंना ती फिन चिपतआना अरा खट्टना गही चिहुँट अम्बा नंना।

Version : Kurukh

निगनिगरका

जुक्की रअु आदिबासिर अरा कुँडुखर	3
उराँव आदिबासिर गही संख्या	4
अयंग कत्था	5
टुडना-बचना	6
धरम-करम अरा परब गुट्ठी	7
खौडहा उज्जना	8
अस्सना-पाडना अरा नलना	9
धतम्	9
किचरी डोड्डो	10
ओन्ना-मौखना	10
चुड्डा कत्था	10



चित्र 1: कुँडुख खदर, लण्डी लोहाड़ी ओनर खुशमारआलनर।

जुक्की रअु आदिबासिर अरा कुँडुखर



चित्र 2: बंगलादेश ता मरमा आदिबासिर गही एडपा

बंगला देश नू एनदोय नय(उन्तीस) गोटेग जुक्की रअु आदिबासिर रअँनर। आ मदका नू चकमा, मरमा, त्रिपुरा, संथाल, गारो, मनिपूरी, तांचागया, हाजोग, माघ, राखाईन, मरू/मरो, लुसे, उराँव, मुण्डा, मुरोंगम, खासिया, पांखो, बावम, बेदी, बागदी, खुमी, राजबांगसी, चाक, खायंग अरा पहाड़ियार गुट्ठी मन्नर। बंगलादेश नू जमा दोय सोडिम(दश हजार) अंडसा अंडसी मन्नर, इदातो बंगला देश ता जमा आलार गही ओन्द प्रतिशत आदिबासिर मन्नर। बंगला देश गही दोय नय दयदोय अखदोय(उन्तीस सौ अस्सी) ता मर्दुमसुमारी गही तेंगना लेखे आदिबासिर गही गिनती धरम जोक्खा नू हिन्दुर एनदोय नाख(24), बुद्धिस्ठिर नाखदोय नाख(44), खिस्तानर दोय मूँइ अरा नंना आलार दोय नय दयदोय पांति रअँनर। बग्गे आदिबासिर(778,425) परता अरा पद्दा खेप्पा नू उज्जनर बिज्जनर दरा गोटे बेलखाप नू बीड़िकर रअँनर। आदिबासी समाज ता आलार मजही अनइत किसिग गही उज्जना बिज्जना, भाखा अरा चिन्हा गुट्ठी एःरना नू बरअी। आर गही खोंडहा उज्जना, बेंजा-काजी, कुन्दुरना अरा खेअँना गही नेगजोग, अत्तना पुन्दुरना अरा ओन्ना मोंखना, उर्मीदिमअ बेलखाप ता नंना आलार ती तरकुटिम एथेरअी। आर किसिम किसिम गही भखा कच्छनखरनर, जोक आदिबासिर गही तंगआ भखा रअी अरा जोक्कर गही तंगआ भखा गही टूढ़ना चिन्हा हूँ रअी। बंगला देश ता बग्गे कछनखरअु भाखा परिवारन् मूँद खंद नू खट्टर एःरा गे ओंगदत्।

अबड़ा खंद तली -

- तिब्बो-बर्मस : गागो, कोच, तिपरा अरा चित्तागोंग परता दलखा ता सौसे आदिबासिर।
- आस्ट्रो-एशियाटिक चाहे मोन्-खमेर - इन्नु खासी, संथाल, मुण्डा अरा महालीर बरनर।
- दाविडर - इन्नु कुँडुखर अरा पहाड़ियार बरनर।

इबड़र ती नंना आदिबासी खोंडहा तर बंगला मेसेरका भाखा कछनखरनर। एका से का चकमा अरा तांचिंग्या आदिबासिर बंगला ती उर्खका ओंटे भखन कछनखरनर। राजबंशी, पहाड़ी, कोच अरा पाथोर्र तम्है मूद भखन् मोधर्र दरा एब्सचर चिच्चर अरा अक्कु बंगलम् कछनखरनर। मानिम, उर्मी आदिबासी खोंडहा ता आलार अक्कु इर्ब भाखा कछनखरनु मंज्जर केर्र। आर बंगाली खोंडहा ता कोहा समाज ता आलार गने कछनखरआ गे बंगला भखन सिखरनर, पहें ताम ताम तंगहा खोंडहा ता आलार मजही तंगआ भखा नू कछनखरनर।

उराँव आदिबासिर हूँ बंगला देश ता बेलखाप नू ओन्टा जुक्की रअु आदिबासी खोंडहा ता आलार तलनर। ईर द्राविड जाति गही आदिबासी तलनर अरा अक्कुन गूटी एन्देर गोवाही हूँ मला का उराँवर एकासे बंगलादेश ने बरचर दरा बसचर। भारत ता बेलखाप नू ईर झारखंड ता छोटानागपूर पहाटा, उड़ीसा, असम, पश्चिम बंगाल, राजमहल ता परता पहाटा अरा बिहार राजी नू

बसचका रअँनर। बंगला देश नू रअु उराँव आदिबासिर गही मूली गा भारत नू रअु उराँव आदिबासिर दिम तलनर। उराँव आदिबासिर पुड्डा अरा मोंखारो बेसे मन्नर। आर गही मुँई चिपटारका, चुट्टी मोंखारो पहें जरजटा बेसे मनी। उराँव आदिबासिर कछनखरआ गे एंड किसिम गही भाखा, इदातो कुँडुख अरा सादरी कत्थन बेवहार नंनर। पहें बंगलादेश ता उराँर गही मजही नू सादरी कछनखरना गही बेवहार बग्गे मनी।

कोडे रआ गे दवा बिरो, एडपन् सन्नी नंना रोजोट, फरी अम्म खट्टना अरा साफ सुथरा घी समाजोरी बग्गे जुक्की रअी। आईन कानून नू हूँ बेलखाप ता आदिबासिरिन् खापा बछाबआ गे कोनो अइदका समाजोरी मल्ला। खोंडहा, खुर्जीपट्टी अरा उज्जना बिज्जना नू हीडना डाहना, आल अदिया बेसे मल एकना, खल उखड़ी अरा एडपा पलीन् बच्चना होअँना अरा नंना नंना करने ती उराँव आदिबासिर अरा नन्-आदिबासिर गही मजही नू लार-दुलार गही एम्बा एकना उज्जना मलादिकिम। सरकार नू ईर गही आलार जुक्कम रअँनर।

उराँव आदिबासिर गही संख्या

बंगलादेश बेलखाप गही समतर पहाटा ता पद्दा खेप्पा अरा देहात नू रअु कुँडुखर गही गिनती एःरा खने, ईर उतरे-पछमें बंगलादेश नू

बसअु आदिबासिर मजही एंडता कोहा आदिबासी तलनर। कुँडुख आलर पंचागर जिला, ठाकुरगांव, धिनाजपूर, रांगपूर, जोयोपूरहाट, नोवागांव, राजसाही, चापईनवाबगंज, नातोरे, सिराजगंज, गयबंद्धा, उतरे-पछमें बोगरा, गाजीपूर, हाबिगंज, अरा पूरबे नू मौलबी बाजार नू डेरा बसा नंनर। राजसाही अरा नवागांव जिला नू ईर गही गान अजगूत बग्गे रअी। राजसाही ता गोदागरी उपजिला नू ईर बग्गेम रअंनर। गोदागरी नू आलार गही संख्या 2,17811 मन्नर, एकन्नु मेतर् बखरा नू 50.88 दयदोय पांति अरा मुक्कर 49.12 दयदोय पांति मन्नर। धरम बेसे एरोय होले जोलहर 86.55 दयदोय पांति, हिन्दुर 8.05 दयदोय पांति, ख्रिस्तानर 1.93 दयदोय पांति अरा नंना आलर 3.47 दयदोय पांति मन्नर। इबडार नने रकम गही आदिबासिर तलनर, संथालारिन जोडओय होले ईर गही जमा परिवार 3,749 मनी। पढ़अु लिखअु आलार 27.6 दयदोय पांति, एकन्नु मेतर 27.6 दयदोय पांति अरा मुक्कर 22.6 दयदोय पांति मन्नर।

अयंग कत्था

कुँडुख खोंडहा ता आलार कछनखरआ गे एंड किसिग गही भाखन् बेवहार नंनर, ओन्टे कुँडुख अरा नंना सादरी। इबडा एंडो भाखा गही तंगआ टुडना चिन्हा मल्ला, पहें एडपा पली अरा तंगआ खोंडहा मजही नू उल्ला नीत ता उज्जना ने बेवहार नंनर। कुँडुखर गही अयंग कत्था कुँडुख हिके, एकदा भारत बेलखाप ता

छोटानागपूर पहटा ता कुँडुखर मजही कछनखरतारअी। अन्नुहूँ, बंगलादेश ता कुँडुखर सादरी भाखनतिकेम बग्गे कछनखरनर। इकला रांगपूर, बोगरा, राजसाही अरा धिनाजपूर पहटा ता कुँडुख खोंडहा ता आलार इदिन कछनखरनर। “इबडा पहटा नू 90,000 कुँडुखर बसचकर रअंनर, पहें इकला 25,000 कुँडुखर तंगआ अयंग कत्थन कछनखरनर, आर मजही ता बग्गे आलार कुँडुखर ती बग्गे सादरी भाखन कछनखरआ गे पसिंदआनर।” ढाका युनिवर्सिटी ता ओन्टे कोहा लूरकुडिया ता मास्टरस अन्नेम आनदस्।

“बंगलादेश नू अंडसा अंडसी 1,10,000 कुँडुखर रअंनर। आ मदहे नू इकला 30,000 कुँडुखर तंगआ अयंग कत्थन कछनखरनर।” रांगपूर अरा धिनाजपूर ता कुँडुखर कुँडुखर कछनखरनर। उमीन्ति बग्गे कुँडुखर कछनखरअु कुँडुखर रांगपूर नुम रअंनर अरा उमीन्ति जुक्की कुँडुखर कछनखरअुर सेयलहेट नू रअंनर। उतरे तरता उजजु-बिज्जुर तंगआ अयंग कत्थन मोधरार केरार।

ओन्टे जोख कुक्कोस नेक्खअंय उमर एनदोय चान रहचा होतन, आस तेंगदस, का “ एंग अज्जोस ई पच्चा भाखन् कछनखरआ लगियस। ढाका युनिवर्सिटी ता ओन्टे कोहा लूरकुडिया ता संघरअु भाखा मास्टरस सौरभ सिकदारस् गही अईकाचका बेसे “दुई पिडही मूद गूटी ता पुरखा कुँडुखर तम्है अयंग कत्थन कछनखरआ लगियर, अरा अक्कु एन्ने बेडा बरओ का बरना एनदोय ती एनदोय पंचे बखर गूटी नू कुँडुखर मजही ती ई भाखा नुखरओ दरा कालो।”

भाखा गही रूपे नू सादरी भाखा ढेर बगगे जिला नू कुँडुखर मजही कछनखरतारआ। अजगुत बगगे बक् गा बंगला भाखा बेसेम मनी। एकासे का, बक "मैनो" अंग्रेजी भाखा नू मनी, एकदन् बंगला नू "आम" अरा सादरी नू "अम्बा" बअँनर। सादरी भाखा नू अनईत बगगे बंगला बक् कोरचा केरा, एन्देरगे का कुँडुखर, बंगला कछनखरअु आलार मजही अजगुत उल्ला ती संगेम रअँनर। अवंगे न ढेर बगगे एन्ने कुँडुख रअँनर ने जे का बंगला भाखा कछनखरआ अरा बुझुरआ ओंगनर। सादरी ती नंना, कुँडुख भाखा तंगआ मूःली रूपे नुम अक्कु गुटी रअी अरा अरबर परबर गही बुझुरना गही बुता नू मल्ला।

टुङना-बचना

बंगलादेश ता आदिबासी खोंडहा नू बहुत जुक्की आलार बच्चका टुङका रअँनर। ईर गही बचना गही अस्तर अरा रेट अनइत सन्नी रअी। चान 1991 ता मारुमसुमारी लेखे, इकला 14.1 दयदोय पांति आलार बच्चका रअँनर। आदिबासी मुक्कर गही दसा गा और खतरका रअी, आर गही संख्या 7.41 दयदोय पांति, पहें मेतर गही संख्या 20.5 दयदोय पांति रअी। चान 1997 ता, कुँडुख जोंखारिन कमना रोजोट गही खुजका बिद्का लेखा गईबंधा नू उमीन्ति ती मेच्छा इदातो 28.2 दयदोय पांति बच्चका रेट रअी। ठाकुरगांव नू 26.6 दयदोय पांति, रांगपूर नू 18.1 दयदोय पांति, जोयपूरहाट नू 17.7 दयदोय पांति , धिनाजपूर नू 17.6 दयदोय पांति, सिराजगंज

नू 14.1 दयदोय पांति, नातोर नू 11.6 दयदोय पांति, चापई नोवाबगंज नू 11.3 दयदोय पांति , नोआगांव नू 7.7 दयदोय पांति, राजसाही नू 5.6 दयदोय पांति, बोगरा नू 6.2 दयदोय पांति अरा पंचागर नू 5.2 दयदोय पांति आलार बच्चका रअँनर।



चित्र 3: लूरकुड़िया खदर

लूरकुड़िया नू आदिबासी भाखन् पढाबअँना गही एन्देर समाजोरी हूँ मल्ला। टुङना बचना गही खन्ध नू पुरहेम जुक्की कुँडुखर उमी किसिम गही अस्तर ता लूरकुड़िया नू मास्टर गही रूपे नू कोरचकर रअँनर। आदिबासी आलार गही टुङना-बचतआना गही पईत नू सरकार गही रोजोट जुक्की अरा मेच्छा रअी। जुक्की रअु आदिबासिर गे लूरकुड़िया नू कोरना, छात्रवृति अरा मस्टारी नू

जोक्क कोटा गुट्ठी हूँ रअी, पहें इबड़ा दव संगे सरयारआ पोल्ला लगी।

अन्नु हूँ, चान अक्टुबर 2002 नू, युनेस्को गही संघरा ती कुँडुख आदिबासिर गही जुक्की टुड़ना-बचना गही रेटन् पर्दआ खतरी टुड़ना-बचना रोजोट ओरे मंजा। इदि गही घोक् का, कुँडुखर मजही



चित्र 4: खदर बचनाकोठरी नू रअँर

आर गही भाखानुम बचना पुथि गुट्ठिन चिपतअँर पर्दआना रहचा। पहें इदि गही बाचतआना आबो हूँ सादरी नुम रहचा, एन्देर गे का सादरी भाखा आर नु बग्गेम बेवहार नू बरअी।

धरम-करम अरा परब गुट्ठी

नंना नंना आदिबासी खोंड़हा बेसेम, कुँडुख खोंड़हा नू हूँ धर्मस गही सिरजाचका आलोन पूजा नंना गही चलन रअी। आर अन्नु हूँ, पत्तआनर का इबड़ा उर्मी सिरजारका आलो गही ओन्टे सिरजअु धर्मस रअँदस ने जे का बी:डी नू बसा नन्दस। कुँडुख गही अनइत बग्गे धरम गही नेग चार बी:डी गही चौगुड़िम किन्दरारअी। ईर पतआनर का अजगुत बग्गे देवता-देवती पद्दा खेप्पा, खल-उखड़ी, पर्ता-टोड़ंग अरा मरखी गुट्ठी गही रूपे नू बसा ननी। हिन्दु खोंड़हा बेसेम ईर हूँ परब मनाबअँर इबड़ा देवता-देवतीन् रिझाबअँनर। एकासे का, हिन्दुर नू भादु परब अरा कुँडुखर नू करम परब ओन्टेम बेसे लगी। कदम इदातो करम मन्नन् चाहे अदि गही डाड़न ईर पूजा ननर्। सचेनुम, भादु अरा करम, एंडो नामे नंना नंना भाखा नू बअँनर, पहें ओन्टे मन्न दिम तली। धरम परब हरयारी अरा सरहुल, एंडोद धर्मस ती तंगआ तंगआ खल उखड़ी गही मंदयारना अरा खेस अरा खंजपा गही दव मना खतरी धर्मस ती गोहरारना गही परब तली। कुँडुखर मन्न-मास, परता टोड़ंग, पूँप अरा खंजपा गुट्ठिन खल मंदयारआगे, बग्गे उपजा मनागे अरा ससईत ती बछरआ खतरी पूजा ननर्। मुक्कर हूँ मेतेर लेखेम गोहरारनर। आर गही पुजा-पाठ तम्है उज्जना-बिज्जना, ससईत गुट्ठी ती बछरना अरा



चित्र 5: सरना बखइर, कुँडुखर गही निमन अड्डा, एकदा चाला पच्चो गही एडपा तली।

उज्जना नू रासी मना खतरी मनी। कुँडुखर जादु-टोना गुट्ठी नू हूँ पईतआनर। ईर गही उर्मी परब, बेंजा-काजी गुट्ठी साहे बेसेम मनी। एकासे का, बसुन्धरा बैसाख चन्दो नू, भदरी भदो चन्दो नू, जेजुठी अगहन चन्दो नू, इटु फग्गु नू अरा सरहुल चैत चन्दो नू एकदा कुँडुखरिन खेती-बारी तरा जोड़्डी।

कुँडुखर केच्चका आलारिन मांङनर, अड्डा नू गड्डी अरखर माङनर हूँ चिअँनर। केच्चका आलार गही माईन अरा महबा चिआ

खतरी केच्चका मेःद नू पूँप अरा सरना मन्न गही अतखान् चिअँनर। कुँडुखर मरलहा आलार गो नंना आलार बेसेम दुःखे सारनर।

खोंडहा उज्जना


कुँडुखर गही खोंडहा उज्जना नू धुमकुड़िया गही अजगुत महबा रआी। ईर इसकुल बेसे ओन्टे एडपा कमनर, एकईय्या आर तम्है पर्दका जोखर पेल्लारिन तम्है उज्जना एकना, धरम-करम, नेगचार गुट्ठिन तेंगनर मेंदनर दरा बड़ियर कमनर, अदि गही संगे संगे पर्दका जोखर पेल्लर गो हेल्ले जोल्ले मना खतरी मोका चिअँनर, जेनू का आर ताम-ताम नुम बेंजेरआ गो पसिंदाचनखरओर। कुँडुखर गही बेंजा-काजी गही नेगचार गा संथालार अरा मुण्डार बेसेम मनी। बेंजा गही समाजोरी एडपा ता मूध आलस चाहे तंग्यो तम्बार तिम मनी, पहेँ कुक्को-कुकोयर गही घोख अरा जिया ता मनेन् हूँ मेन्नर-खोजनर अरा आ लेखेम नंनर। खद्द बेंजा गही बेवहार कुँडुखर नू खोंडहा रूपे नू मल्ला। अम्बर नखरना गही रिवाजन् ईर ईजिरनर। अम्बरका मेतस् अरा मुक्का, एंडो नंना बेंजेरआ ओंगनर। एंडो अम्बरका मेतस अरा मुक्कद् कईको झन बेंजेरआ ओंगनर, पहेँ तंगआ मुक्का चाहे मेतस् गही उज्जना नू आर नंना बेंजेरआ गो पोलनर।

कुँडुख खोंडहा नू पच्चा पंचायती चलन बेसेम खोंडहन् चलाबअँनर। खोंडहा ता अगुवा चाहे नैगस गही कत्थन ईर ईजिरनर। ईर बगगे टूडचका-बच्चका मल रअँनर।

अस्सना-पाड़ना अरा नलना



चित्र 6: खेल
(इबड़ा एंडो बजा पकम चलन नू रओी)



चित्र 7: नगरा

नंना आदिबासिर बेसेम कुँडुखर हूँ नलनर बेचनर, पाड़नर अरा बजा गजन् अस्सनर दरा रिझरनर। आर गही नलना बेचन अरा डण्डी तम्है उज्जना बिज्जना अरा खोंडहा उज्जना गने बगगेम गड्डी ती जोड़ोरकी बेओी। अस्सना नू खेल, ढोलकी, नगरा, मुरली गुटिठी मनी। खेल अरा नगरा ईर गही मूध बजा तली। ईर एकदा डण्डीन् पाड़नर, आद आर गही उज्जना बिज्जनान् ए:दओी। झुमर डण्डी आर गही उज्जनान् अरा धरम-करम गही गड्डी घोखन एदओी। आर गही डण्डी अरा नलना बेचना साहे अरा परब बेसेम मनी, अवँगे

आर साहे अरा चान बेसेम पाड़नर दरा नलनर बेचनर। उर्मी धरम-करम अरा नेगचार साहे बेसेम मनी, एकासे का, बसुन्धरा बैसाख चन्दो नू, भदरी भदो चन्दो नू, जेजुठी अगहन चन्दो नू, इट्ट फग्गु नू अरा सरहुल चैत चन्दो नू एकदा कुँडुखारिन खेती-बारी तरा जोड़ओी। बैजा डण्डी अरा नलना बेचना हूँ नंना साहे डण्डी अरा नलना बेचना ती नंनम् मनी। कुँडुखर मजही करमा, सरहुल, झुमर, डोमकच, भदरी, जेजुठी, इट्ट अरा जतरा डण्डी अरा नलना बेचना गही चलन रओी।

धतम्

कुँडुखर तम्है खल गही अदिया खतरी गे मसकत् नन्नर। अनइत बगगे कुँडुखर गुसन गा तंगआ खल-उखड़ी दिम मल्ला। एन्ने ढेर



चित्र 8: खेस खल, मुक्कर रोआ इदआलनर, चित्र 9: गोहला उयलदस

बग्गे आलार सझहा नू चाहे बनीहारी नना कानर। ईर गही ढिबा अर्जआना ती बग्गे खरचा मनी काली, अवाँगे ईर गोल्लर अरा महाजन आलार ती उधरा पंइचा मंन्नर। कुँडुख़र गही मूध नलख उयना-खोतना तली। मेतर खल्लन उयन् अरा मुक्कर आर गही उद्म नू संघरा चिअँनर। एःरागे बरआी का मुक्कर मेतर ती हूँ बग्गे ओत्था नलख नंन् अरा खल उखड़ी गही नलख नू तमन् लट्ख़आनर, इंजो, अमखी अरा खंजपा गुट्ठीन् ढिबा कमाबआ गे बीसनर दरा एड़पा ती चिरखिन सम्भड़आनर। खल मलका मुक्का मेतर रेजा कुली गही नलख नंन्।

किचरी डोड्डो

कुँडुख़ मुक्का मेतर अयंधआ सोजहे किचरिन अत्तनर पुन्दुरनर। मुक्कर लकीर चिरचका पइर आबो सड़िन अरा मेतर धुती अरा लुंगी नंन्। मलका मेतर गमछा गुट्ठिन पोजोरनर। कुँडुख़ पेल्लर अरा मुक्कर तम्है सिंगार पालार गही पकम तिहा नंन्। आर तम्है टोटा नू हँसली, खेबदा नू लोला अरा कुक्क नू पूँपन खोसोरनर। मुक्का अरा मेतर तम्है खेड्ड खेक्ख अरा कया ता नंना नंना अड्डा नू हूँ बन्ना चखरनर। बग्गे टुड़का-बच्चका अरा लूरगरिया कुँडुख़र झुला, दिगहा पेंट अरा कोट गुट्ठी अत्तनर।

ओन्ना-मोंखना

खेस तिखिल गही मण्डी कुँडुख़र गही मूध ओन्ना मोंखना तली। अदि ती अदका आर अमखी, इंजो, अरा अहड़ा मण्डी गने ओन्नर मोंखनर। आर एड़पा नू कमचका अरखी, एकदन बंगलादेश नू पचई(झरा) हूँ बअँनर अदिन ओन्नर। ईद तिखिल ती बनआी। मदगी गही अरखी हूँ कुँडुख़र ओन्नर पहे ईद एकवारगी जुक्की चलन नू रआी।

चुड्डा कथा

कुँडुख़र गही पर्दना खतरी आर गही तिहा अरा पर्दना कड़ी नू जोड़ोरना दरा चोअँना गही चिहँट पकम चाड़े रआी। टुड़ना-बचना पर्दना गही ओन्टे कोहा कमहड़ तली, एकत्ती आलार खोंडहा अरा खुर्जी पट्टी नू पर्दा गे ओंगनर। पोलना टुड़ना-बचना गही ओन्टा करने मलका उज्जना तली। बेड़हा घोख(रूढ़िवादी बिचार) अरा उज्जना आर गही मलकन और मेच्छा परदआी चिआी। अनइत बग्गे कुँडुख़र गा खिसतान मंज्जर केरार्। ई बेड़ा नू अनभनियाँ नन्-सरकारी खोंडहा गुट्ठी कुँडुख़र गही मजही नू आरिन खोंडहा अरा खुर्जी पट्टी नू पर्दा गे तम्है रोजोट तरू चिहँट नना लगी।



